

JU ZA PREDŠKOLSKI ODGOJ I OBRAZOVANJE
OBDANIŠTE „TRAVNIK“ TRAVNIK

PRAVILNIK O PREVENCIJI I
SPREČAVANJU KORUPCIJE U JU
OBDANIŠTE TRAVNIK

Travnik, mart/ožujak 2022. godine

Na osnovu Člana 68. Statuta JU za predškolski odgoj i obrazovanje obdanište „Travnik“ (Travnik broj: 158/20 od dana 21.12.2020. god.), Zakona o suzbijanju korupcije i organiziranog kriminala u Federaciji Bosne i Hercegovine („Službene novine FBiH“, broj: 59/14), Upravni odbor na sjednici održanoj dana, 28.03.2022.godine donosi:

PRAVILNIK O PREVENCIJI I SPREČAVANJU KORUPCIJE U JU OBDANIŠTE TRAVNIK

I OPĆE ODREDBE

Član 1.

(Predmet Pravilnika)

Ovim Pravilnikom utvrđuju se način imenovanja Tima za prevenciju i sprečavanje korupcije (u daljnjem tekstu: Tim), način imenovanja koordinatora antikorupcijskih aktivnosti (u daljnjem tekstu: Koordinator), zadaci i principi rada Tima i Koordinatora, oblici djelovanja i nadležnosti Tima i Koordinatora, te načini prevencije korupcije u JU obdanište Travnik.

Član 2.

(Definicija korupcije)

U smislu ovog Pravilnika, korupcija označava svaku zloupotrebu povjerenja i položaja organa, rukovodioca ili uposlenika JU obdanište Travnik, radi sticanja lične koristi, uključujući mito, iznudu, sukob interesa i nepotizam.

Član 3.

(Tim za prevenciju i sprečavanje korupcije)

Tim u sastavu od tri (3) člana imenuje Upravni odbor JU obdanište Travnik na period od godinu dana s mogućnošću ponovnog izbora istih članova. Tim na prvom sastanku bira koordinatora, koji upravlja aktivnostima tima.

Član 4.

(Zadaci tima)

Zadaci Tima za prevenciju i sprečavanje korupcije su:

- Identificiranje i eliminiranje uzroka korupcije;
- Odvracanje od činjenja krivičnih djela u vezi s korupcijom;
- Podsticanje učešća korisnika usluga u prevenciji korupcije;
- Podizanje svijesti javnosti i stvaranje odnosa netolerancije prema korupciji;
- Promoviranje transparentnog i odgovornog rada organa, rukovodioca ili uposlenika.

Član 5.

(Principi rada)

U obavljanju svog rada Tim se pridržava sljedećih antikorupcijskih principa:

- Zakonitost – mjere za prevenciju korupcije bit će provedene u skladu sa Ustavom i zakonima Bosne i Hercegovine, na način koji osigurava poštivanje ljudskih prava i osnovnih sloboda;

- Transparentnost – rad će biti transparentan;
- Interakcija – efikasnost mjera za prevenciju korupcije bit će osigurana kroz koordinaciju aktivnosti sa Upravnim odborom, te Osnivačem – Općinom Travnik, razmjenom informacija među njima i uzajamnom saradnjom;
- Kontinuitet – uspostavljanje i provođenje efikasnih mjera za prevenciju korupcije njihovim kontinuiranim nadzorom i pregledom.

Osim principa iz Stava 1. ovog Člana, Tim će u svom radu primjenjivati principe efikasnosti, ekonomičnosti, odgovornosti i dosljednosti.

Član 6.

(Oblici djelovanja i nadležnosti Tima)

Tim u roku pet (5) radnih dana od dana prijema prijave procjenjuje da li su navodi u prijavi osnovani i odlučuje o otvaranju postupka ispitivanja prijavljenog slučaja ili odbacivanju prijave.

Tim u roku od deset (10) radnih dana od dana prijema prijave provodi postupak ispitivanja navoda iz prijave prikupljanjem materijalnih dokaza, saslušavanjem svjedoka i osoba za koje postoje indicije da su učestvovala u koruptivnim radnjama.

Tim sačinjava izvještaj o obimu koruptivnih radnji, uključenim osobama i njihovim pozicijama, te posljedicama koje su koruptivne aktivnosti uzrokovale po ustanovu, koji prosljeđuju Upravnom odboru.

Ukoliko Tim utvrdi da koruptivne aktivnosti imaju obilježja krivičnog djela prema Krivičnom zakonu FBiH i Krivičnom zakonu BiH, dužan je uz koordinaciju sa Osnivačem – Općinom Travnik (Služba za razvoj, privredu i vanprivredu Općine Travnik i Tim za prevenciju i sprečavanje korupcije Općine Travnik) donijeti mišljenje o postojanju osnova za podnošenje krivične prijave nadležnom tužilaštvu.

Tim uz koordinaciju sa Osnivačem – Općinom Travnik sačinjava dodatni izvještaj o eventualnim sistemskim propustima koji su doveli do pojave koruptivnih radnji, te predlaže mjere i preporuke za otklanjanje propusta, u cilju preventivnog djelovanja.

Član 7.

(Obavezna saradnja)

U obavljanju zadataka iz svoje nadležnosti, Tim saraduje sa direktorom, Upravnim odborom, te Osnivačem – Općinom Travnik.

Upravni odbor i direktor obavezni su da saraduju s Timom, te dostavljaju sve potrebne podatke i informacije po zahtjevu Tima.

Član 8.

(Sankcionisanje)

Sankcionisanje učesnika u koruptivnim aktivnostima koje nemaju obilježja krivičnog djela u smislu izricanja određenih mjera obavljat će se u skladu sa važećim Pravilnikom o radu.

Član 9.

(Obavještavanje javnosti)

U obavljanju zadataka Tim će kontinuirano obavještavati javnost o svim aspektima korupcije.

Tim će svoje izvještaje, analize i druge akte objavljivati na web stranici javne ustanove ili na drugi način obavještavati javnost.

II PRIJELAZNE I ZAVRŠNE ODREDBE

Član 10.

(Zakonski i podzakonski akti)

Za sva druga pitanja iz ove oblasti koja nisu regulisana ovim Pravilnikom primjenjivat će se odredbe Zakona o suzbijanju korupcije i organiziranog kriminala u Federaciji Bosne i Hercegovine („Službene novine FBiH“, broj: 59/14), te odredbe Zakona o zaštiti lica koja prijavljuju korupciju u institucijama Bosne i Hercegovine („Službeni Glasnik BiH“, broj: 100/13).

Član 11.

(Dostupnost)

Ovaj Pravilnik mora biti dostupan uposlenicima JU obdanište Travnik kako bi se oni mogli upoznati s njegovim sadržajem.

Član 12.

(Izmjene)

Ovaj Pravilnik može biti izmijenjen i dopunjen na način koji je prethodio njegovom donošenju.

Član 13.

(Stupanje na snagu)

Ovaj Pravilnik stupa na snagu osmi (8.) dan od dana objavljivanja na Oglasnoj ploči JU obdanište Travnik.


**

Broj: 56/22

Datum: 28.03.2022.god



predsjednik Upravnog odbora


Danijel Blažević, mag. ped

BOSNA I HERCEGOVINA
FEDERACIJA BOSNE I HERCEGOVINE
KANTON SREDIŠNJA BOSNA

JU OBDANIŠTE-TRAVNIK-
TRAVNIK

UPRAVNI ODBOR

Broj: 56-1/22

Datum: 28.03.2022. god.

Na osnovu Člana 68. Statuta JU za predškolski odgoj i obrazovanje obdanište „Travnik“ Travnik broj: 158/20 od dana 21.12.2020. god.), Zakona o suzbijanju korupcije i organiziranog kriminala u Federaciji Bosne i Hercegovine („Službene novine FBiH“, broj: 59/14), Upravni odbor na sjednici održanoj dana, 28.03.2022.godine donosi:

O D L U K U

I

Usvaja se Pravilnik o prevenciji i sprečavanju korupcije u JU obdanište Travnik.

II

Odluka stupa na snagu osmi (8.) dan od dana objavljivanja na Oglasnoj ploči JU obdanište Travnik.



Predsjednik UO

Enijel Blažević, mag.ped.